



Aatsitassanut inatsisip allanngortinneqarnissaanut siunnersuummik UKA2022-mi saqqummiussinissamik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut, taamaalilluni inatsimmi § 1, imm. 2 ima oqaasertalerneqassalluni: “Ingerlatanik inatsimmut ilaasunik suliarinninnermi isumannaallisaaneq, peqqissuseq, avatangiisit, pisuussutunik atorluaaneq kiisalu inuiaqatigiinnut akornutaanngitsumik ingerlatat suliarineqarnissaat kiisalu pissutsini assigiinngitsuni nunat tamat pitsaanerpaamik ileqqorissaartarnerat akuerisaasut qulakkeerneqarnissaat Inatsisartut inatsisaatigut anguniarneqarpoq”. § 83-mi oqaasertaliusseq “nunat tamat ileqqorisartagaat pitsaasut” aamma ”nunat tamat pitsaanerpaamik ileqqorisartagaat, Kalaallit Nunaanni pissutsinut naleqqussagaq”-mut aamma allanngortinneqassaaq. Taamattaq misissueqqaarnissanut qinnuteqaatinik paasissutissanik Naalakkersuisut tamanut saqqummiussisalernissaannik inatsimmi aalajangersagaliisoqassaaq, taamaaliornikkut piffinni innuttaasut soqutigisaqartullu allat, sapinngisamik siusinnerpaamik taamatut suliaqartoqarnissaanik ilisimasaqalersinnaaqullugit.

Siullermeerneqarnera

Mariane Paviasen saqqummiusnaanut qujanaq.

Naalakkersuisut aatsitassanut aammalu annikitsumik aatsitassarsiornissamut inatsimmi saqqummiinissaat qilanaaraarput, inatsisissat taakkua marluk innuttaasuni akuutinneqarnissaannut aammalu ammasumik suliarineqarnissaannut, taamatullu avatangiisinut pitsaasumik atuinissaq piumasaaqatitigut ersarissanissaat Naleqqamiit qilanaaraarput.

Avatangiisinut sunniutaasinnaasunut nalilersuisarnermut tunngassuteqartut aammalu aatsitassarsiornermi isumannaallisaaneq, peqqissuseq, avatangiisit, pisuussutunik atorluaaneq kiisalu

inuiaqatigiinnut akornutaanngitsumik ingerlatat suliarineqarnissaat kiisalu pissutsini assigiinngitsuni nunat tamat pitsaanerpaamik ileqqorissaartarnissaanut tunngassuteqartut soqutiginartutut isigaavut.

Naalackersuisut inatsisissatut siunnersuutit marluk taakkua suliarineqarneranni allannguutissatut kissaatigineqartut isiginninniarnarat aammalu allannguutissatut siunnersuuteqarnerat maluginiarparput. Taamaattumik sukumiisumik ataatsimiititaliamut susassaqartumut ingerlateqqinneqarnissaat innersuussutigalutigu.